

I - ARABAKO BATZAR NAGUSIAK ETA ARABAKO LURRALDE HISTORIKOAREN FORU ADMINISTRAZIOA

Arabako Foru Aldundia

OGASUN, FINANTZA ETA AURREKONTU SAILA

Foru Gobernu Kontseiluaren 54/2018 Foru Dekretua, urriaren 16koa. Onestea abenduaren 30eko 66/2003 Foru Dekretua aldatzea, zeinaren bidez onetsi baitzen ondare eskualdaketen eta egintza juridiko dokumentatuen gaineko zergaren erregelamendua

Aldatzea abenduaren 30eko 66/2003 Foru Dekretua, zeinaren bidez onesten baita ondare eskualdaketa eta egintza juridiko dokumentatuen gaineko zergaren arautegia

Martxoaren 7ko 2/2018 Foru Arauak, Arabako zerga sistemako hainbat arau eta zerga aldatze-koak, araudi berria ezarri zuen ondare eskualdaketa eta egintza juridiko dokumentatuen gaineko zergan autolikidazioak bide telematikoen bitartez aurkezteko.

Aldaketa honen xedea da araudi horretara egokitzea ondare eskualdaketa eta egintza juridiko dokumentatuen gaineko zergaren arautegia.

Zeharkako Zergen Zerbitzuak eta Aholku Batzordeak horri buruz emandako araudi eraginaren txostenak azertu dira.

Horregatik, Ogasun, Finantza eta Aurrekontu Saileko foru diputatuak proposatuta, eta Foru Gobernuaren Kontseiluak gaur bertan egindako bilkuran gaia azertu ondoren, honako hau

XEDATZEN DUT

Bakarra. Aldatzea abenduaren 30eko 66/2003 Foru Dekretua, zeinaren bidez onesten baita ondare eskualdaketa eta egintza juridiko dokumentatuen gaineko zergaren arautegia.

Bat. 36. artikulua aldatzen da eta honela geratzen da:

"36. artikulua. Autolikidazioa

1. Subjektu pasiboek zerga administrazio organo eskudunetan aurkeztu beharko dute zergaren autolikidazioa, Ogasun, Finantza eta Aurrekontu Saileko diputatuaren foru aginduz onetsitako ereduaren bidez. Horrekin batera, zerga sortzen duen egintza jasotzen duen notario, epailetza edo administrazio dokumentuaren kopia kautotua eta haren kopia bat aurkeztu beharko dira.

Dokumentu pribatuak badira, jatorrizkoa eta kopia aurkeztu beharko dira, autolikidazioarekin batera.

2. Egintza edo kontratua ez badago dokumentu baten barruan, subjektu pasiboek, autolikidazioarekin batera, aipatutako dokumentua ordezkatzeko idatzizko aitorpena aurkeztu beharko dute, zeinak autolikidaziorako baldintza aipagarriak jaso beharko baititu.

3. Aurkeztutako dokumentuetan ez bada zehazten zergari lotutako ondasun edo eskubideen balio berezia, balio horiek adierazten dituen aitorpen sinatua aurkeztu beharko dute interesdunek. Baldin interesdunek ez badute hori egiten, Bulego Kudeatzaileak ezarri ahalko ditu balio bereziak.

4. Era berean, autolikidazioarekin batera, zerga zorra zehazteko behar diren dokumentu osagarriak aurkeztu beharko dira edo, egoki bada, zerga horri atxikita ez egoteko, zerga horretatik salbuetsita egoteko edo murrizketa, hobariak, zerga tasa murriztuak edo zerga horretan beste edozein zerga onura izateko bete beharreko baldintzak betetzen direla egiaztatzen duten dokumentuak."

Bi. 37. artikulua aldatzen da eta honela geratzen da:

“37. artikulua. Autolikidazioaren aurkezlea

1. Autolikidazioa aurkezten duena, aurkezteagatik bakarrik, zerga ordaintzera behartuta dauden ordezkari izango da.

2. Autolikidazioaren aurkezleari leporaturiko ordezkartzari uko egin ahalko dio aurkezleak, edo interesdunek ordezkartzita kendu ahalko diote, Ogasun, Finantza eta Aurrekontu Sailean idazkia aurkeztuta. Idazki hori aurkezten den unetik aurrera, geroztiko jarduerak zuzenean subjektu pasiboekin tratatu beharko dira.”

Hiru. 38. artikulua aldatzen da eta honela geratzen da:

“38. artikulua. Aurkezteko epea

1. Autolikidazioak aurkezteko epea hogeita hamar egun baliadunekoa izango da, zerga egitate gertatu eta hurrengo egunetik aurrera.

2. Dokumentu judizialak direnean, egintza edo kontratua ebazpen judiziala irmo bihurtzen den egunean sortu dela ulertuko da.

3. Titularra hil delako sortzen diren gozamen iraungitzei buruzko autolikidazioak aurkezteko epea sei hilabetekoa izango da, gozamenduna hiltzen den egunaren biharamunetik hasita. Berdin dio testamentu eragiketak formalizatu diren edo ez, eta berdin dio noiz eman diren.”

Lau. 39. artikulua aldatzen da eta honela geratzen da:

“39. artikulua. Aurkezteko lekua eta era

1. Subjektu pasiboek autolikidazioak eta gainerako dokumentuak aurkeztu beharko dituzte Ogasun, Finantza eta Aurrekontu Saileko diputatuak horretarako emango duen foru aginduak xedatutako eran eta lekuan.

2. Autolikidazioak bide telematikoen bitartez aurkeztu behar dira, abenduaren 23ko 110/2008 Foru Dekretuak, Arabako foru ogasunari aitortpenak eta autolikidazioak bide telematikoz aurkezteko baldintza orokorrak arautzen dituenak, eta Ogasun, Finantza eta Aurrekontu Saileko diputatuaren foru aginduak, zerga horren autolikidazioen aurkezpen telematikoa onetsiko duenak, xedatutakoaren arabera.”

Bost. 40. artikulua aldatzen da, zeina IV. tituluko IV. kapituluan sartzen baita, eta honela geratzen da:

“40. artikulua. Geroztiko jarduerak

Bulego Kudeatzaileak behin-behineko likidazioak egingo ditu baldin egiaztatzeak zerga oinarriko balio gehitzea badakar, edo salbuetsita edo zergapetuta ez izatearen argudioa bidezkoa ez dela jotzen badu, edo sartutako kuota txikitzea eragin duten errore materialak izan direla egiaztatzen badu.

Zerga oinarriaren balio gehitzea subjektu pasiboari jakinaraziko zaio egindako likidazioaren egintza berean.”

Sei. V. tituluaren izena aldatzen da, eta honela geratzen da:

**“V.TITULUA
DIRU SARREREN ETA ITZULKETEN KUDEAKETA. EFEKTUAK TRUKATZEA”**

Zazpi. V. tituluko I. kapitulua aldatzen da, eta honela geratzen da:

**“I. KAPITULUA
ZERGAREN ORDAINKETA**

41. artikulua. Diru sarrerak egiteko arauak

1. Subjektu pasiboak, arautegi honen 38. artikuluan ezarritako epeen barruan, autolikidazioa egingo du eta dagokion zenbatekoa sartuko du, Arabako Lurralde Historikoko dirubilketa arautegian eta Ogasun, Finantza eta Aurrekontu Saileko diputatuak zerga honen autolikidazio ereduak eta horien aurkezpen telematikoa onesteko emango duen foru aginduan xedatutakoaren arabera.

2. Autolikidazioen zenbatekoa sartu ondoren, subjektu pasiboek zerga administrazioan aurkeztu beharko dute zerga sortzen duen egintza edo kontratua jasotzen edo zerrendatzen duen dokumentuaren jatorrizkoa eta kopia bat, egindako autolikidazioen ale banarekin batera.

3. Zerga administrazioak aurkezleari itzuliko dio jatorrizko dokumentua, egindako diru sarrera eta kopia aurkeztu izana egiaztatzen dituen zigilua jarrita.

4. Baldin autolikidazioaren emaitza ez bada zerga kuota sartu beharra, zuzenean zerga administrazioan aurkeztu beharko da, gainerako dokumentuekin batera, eta zerga administrazioak zigilua ezarriko dio autolikidazioari eta oharra egingo du jatorrizko dokumentuan, jasota gera dadin interesdunen arabera dagokion kalifikazioa, eta aurkezleari itzuliko dio.

5. Artikulu honen 2., 3. eta 4. idatz zatietan xedatutakoa gorabehera, autolikidazioa bide telematikoen bidez aurkezten bada, Ogasun, Finantza eta Aurrekontu Saileko diputatuak aurkezpen telematikoa onesteko emango duen foru aginduan xedatutakoa bete beharko da.

42. artikulua. Autolikidazioa eta dirua sartzea auzi kasuetan

1. Ondasun eta eskubideen eskualdatzei buruz auzia sustatzen denean, ez da etengo autolikidazioa aurkezteko epea, baina subjektu pasiboak, aurrez auzi eskea justifikatuta, aukera izango du autolikidazioaren emaitza den zenbatekoa ez sartzeko ebazpena irmo egiten den egunaren hurrengora arte.

2. Autolikidazioa aurkezteko epea bukatu eta gero sustatu bada auzia eta diru sarrera egin ez bada, zerga administrazioak dokumentuak aurkezteko eta zerga ordaintzeko eskatuko du, bai eta interesdunek euren gain hartutako erantzukizunen kontuak ere.

3. Epeen etetea ez da gertatuko auziaren gai diren ondasun eta eskubideen eskualdatzerako beste ezertarako, hau da, ez da gertatuko dokumentu edo eskualdatze berean sartutako gainerako egintza, ondasun eta eskubideetarako.

4. Baldin auzilariak auziak jarraitzea eskatzeari sei hilabetez uzten badiote, zerga administrazioak eska dezake aurrez aurkeztutako autolikidazioari dagokion diru sarrera egiteko. Auzitegiek auzia sorrarazi duen eskaera iraungi dela deklaritzen badute, diru sarrera egitea eskatuko da, bai eta dagozkion interesak ordaintzea ere, diru sarrerarik egin gabe autolikidazioa aurkeztu den egunaren hurrengotik aurrera. Ondorio bera gertatuko da autoen ibilbidea eteten bada alderdien adostasunagatik.

5. Aurreko idatz zatietan aurreikusitako kasuetan, zerga likidatzeko zerga administrazioaren egintzaren preskripzio epea ez da zenbatzen hasiko kasuan kasuko ebazpen judiziala irmo egin arte.”

Zortzi. 43. artikulua edukirik gabe uzten da.

XEDAPEN INDARGABETZAILEA

Laster ondare eskualdaketa eta egintza juridiko dokumentatuen gaineko zergaren 600 eta 630 autolikidazio ereduak onetsiko dituen foru agindua indarrean sartzen denetik aurrera, indargabetuta geratuko dira martxoaren 12ko 32/1996 Foru Dekretua, ondare eskualdaketa eta egintza juridiko dokumentatuen gaineko zergaren autolikidazio ereduak eta haien edukia onesten dituen; eta apirilaren 11ko 23/2017 Foru Dekretua, zeinaren bidez aldatzen baita martxoaren 12ko 32/1996 Foru Dekretua, ondare eskualdaketa eta egintza juridiko dokumentatuen gaineko zergaren autolikidazio ereduak eta haien edukia onesten dituen.

AZKEN XEDAPENA

ALHAOn argitaratu eta hurrengo egunean jarriko da indarrean foru dekretu hau eta 2018ko azaroaren 15etik aurrera izango ditu ondorioak.

Gasteiz, 2018ko urriaren 16a

Diputatu nagusia

RAMIRO GONZÁLEZ VICENTE

Ogasun, Finantza eta Aurrekontu Saileko foru diputatua

JOSÉ LUIS CIMIANO RUIZ

Ogasun zuzendaria

TERESA VIGURI MARTÍNEZ